

清 史 列 傳

冊 五

清史列傳 卷二十五

大臣畫一傳檔正編二十二

黃仕簡子秉淳

黃仕簡福建平和人由曾祖黃梧率衆投誠封一等海澄公准襲十二次梧子芳度復以闔門殉難准世襲罔替俱有傳仕簡於雍正八年襲爵乾隆九年引見諭曰海澄公黃仕簡著賞給資治通鑑康熙字典上用紬綬仍令回籍伊係功臣之裔朕深望其成立以繼家聲在籍之日勤勉學習閒至督撫衙門聆其教導俟可以來京效力之日再行奏聞請旨十六年上南巡二月在蘇州接駕請當差諭曰黃仕簡奏請當差情辭懇切甚屬可嘉然伊係公爵用以提督總兵方爲允稱但看來年紀未壯若在京賞給差務未免路途遙遠盤折多有不便著總督喀爾吉善再爲敎導學習俟才識堪以勝任之時奏聞請旨三月賞戴花翎十九年授浙江衢州鎮總兵二十三年四月丁母憂二十四年命署湖廣提督軍門二十五年服闋實授九月調廣東提督二十八年調福建水師提督二十九年三月奏廈門

商船雲集相沿索取陋規每船花邊銀一千五百圓不等督撫將軍提督及道府州縣中軍等官各有收受今據提督中軍參將溫泰開送清單事屬確鑿仰懇簡派大員赴閩澈底清查硃批嘉悅之汝可謂知恩朕亦可謂知人五月命尙書舒赫德等往訊尋奏督撫並無收受陋規事屬員惟代購物件屬實上以仕簡所奏尙屬有因免議處八月調廣東提督三十二年調福建陸路提督三十三年陞見命在乾清門行走復授其子黃秉淳爲藍翎侍衛三十四年以失察古田縣奸民蕭日安爲匪降一級留任十二月調水師提督二十五年正月以浙江衢州鎮任內失察嘉興縣陸添餘傳習邪教降一級留任二月奏漳浦縣民在詔安地方謠言惑衆拏獲匪犯蔡烏強等搜出僞劄據供漳浦下會村李阿閔與平和縣朱姓謀不軌阿閔給與劄付令糾夥見獲供出各犯臣隨赴漳浦詔安嚴拏餘黨硃批好已調汝水師矣此次水師雲南出師者竟不堪已有旨諭崔應階及汝汝宜勉力整飭三月奏在梅子坑獲李阿閔審明該犯因貧苦起意糾人搶劫先約蔡烏強入夥輶轉糾集多人並捏造朱振興姓名希圖燭惑經漳浦縣獲蔡烏強阿閔聞風脫逃臣親往緝堅供朱振興姓名係捏造並無其人見經督臣親提嚴訊疏

入報聞三十六年因福建省甄別年滿千總過少降三級留任三十七年六月疏言臣標五營每營額兵九百六十內前後二營戰兵各四百六十守兵五百與營制符合中左右三營全屬戰兵緣前任福建水師提臣萬正色於康熙十八年在湖南岳州帶戰兵三千來閩援剿海氛卽撥入提標中左右三營奏准仍給戰餉彼時爲憂遠涉積勞起見迨各兵陸續開除就閩召募應照例分別戰守方無歧異請將中左右三營戰兵照前後二營例減去戰額五百改爲守兵卽將各營內考技藝稍次者儘數改補如不足俟五營出有戰缺通融援補另募守兵足額議行三十九年十月兵部奏降革處分奉旨准開復四十四年十二月陞見四十五年正月上南巡扈蹕出京賞黃馬褂三月回任是年恩詔加一級四十七年十月奏臺灣有漳泉二府人械鬪流匪乘機搶殺把總林審被戕親赴臺灣督拏諭曰如此辦理方是此案關係重大黃仕簡一聞報卽帶兵渡臺查辦迅速完結自當交部議敍著傳諭黃仕簡卽督同將弁等勉力將首夥各要犯嚴拏務獲十一月諭曰黃仕簡奏抵臺查辦漳泉人械鬪一案先後拏獲要犯多名恭請王命正法各於犯事地方傳首示衆尙有未獲各犯見在查拏務獲等語所辦甚好同日又

據雅德奏到看來此案先後獲犯及辦理情形已有八九成未必致更生事端但尙有未獲聚衆首夥要犯殺官重犯等見在曾否就獲並此外餘黨不可不儘行搜緝務獲以淨根株著傳諭黃仕簡楊廷樺澈底跟查將未獲各犯逐一擒獲永除後患四十八年正月奏先後拏獲臺灣械鬪刀民及殺害汛弁首夥要犯二百餘名分別置法臺灣寧帖命交部議敍加一級諭曰據黃仕簡奏督拏械鬪刀民及殺害汛弁首夥要犯先後共拏獲二百餘名見在民人並無再敢互鬪滋事臺灣所屬均屬寧帖等語所辦甚好已交部議敍矣此案未獲餘黨及焚搶流匪仍著黃仕簡楊廷樺上緊逐一嚴加捕獲審辦完結黃仕簡不可因臺地見已寧帖稍存將就了事之見旋奏遵旨查臺灣府知府蘇泰於漳泉刀民械鬪並不速捕嚴懲輒出示諭和實屬姑息貽誤諭曰漳泉械鬪一案前經雅德具奏稱該府蘇泰前往面加曉諭各莊民遵依允服一摺朕卽慮及該府或竟不知事體輕重有央懇和息之事因諭令黃仕簡等查明據實奏參今據黃仕簡等查奏蘇泰果有勸和出示情事竟不出朕之所料是蘇泰罔顧大體姑息養奸非尋常玩延貽誤可比蘇泰著革職拏解刑部治罪二月奏會同臺灣道楊廷樺續獲械鬪人犯二

百六十名見赴諸羅起事處嚴拏餘匪諭曰據黃仕簡奏會同楊廷樞赴各莊連日搜捕前後拏獲各犯二百六十名將審明起意糾黨焚莊搶殺各要犯先行正法示衆見在漳泉人心帖服各屬寧謐等語所辦實屬可嘉已於摺內批示矣臺灣刀民械鬪一案黃仕簡一聞稟報卽帶兵渡臺查辦將首夥要犯拏獲多人陸續審明正法地方寧靜辦理甚屬安速前已降旨交部議敍著再給黃仕簡上用荷包以示嘉獎又奏訪聞鳳山縣屬小岡山地方有匪徒倡亂隨往搜查並無蹤跡嗣據該縣知縣徐英稟報盤獲形跡可疑之林弄陳虎二名研鞫並無證據諭曰諸羅彰化二縣奸民不法聚衆械鬪甫經嚴拏重治乃又有奸匪豎旗可見臺灣諸事廢弛刀風未息不可不嚴拏究辦從重懲治以靖海疆而安良善至所稱形迹可疑之林弄陳虎二名是誰見其可疑有何形迹如果審明此二人並非豎旗奸匪或卽應問此二人或素有仇人挾嫌藉端陷害嚴切開導詢問從此跟究或可得實何以摺內全未奏及而但云毫無證據乎黃仕簡等查辦奸民聚衆一案甚爲妄速令審辦此事未免疏漏著卽督飭所屬勒限嚴拏奸匪豎旗之人務獲解究不得以查無蹤跡了事三月諭曰據黃仕簡奏拏獲鳳山縣編造逆詞豎

旗圖搶之首犯分別辦理一摺著交三法司覈議速奏至此案首犯陳虎等經鳳山縣知縣徐英因該犯形迹可疑卽行拏獲尙屬能事見在正有查辦之事未便令其引見著加恩加一級以示優獎俟該縣任滿調回內地時著奏聞請旨六月偕楊廷樺奏臺灣兵丁楊祐曾篤等因挾彰化縣民林文韜糾衆抵制夙嫌曾篤設計成擒楊祐用刀剜瞎文韜右眼擬楊祐等罪如例諭曰此案兵丁楊祐曾篤屢次糾人挾嫌爭毆並用刀剜瞎林文韜右眼實屬兇橫不法且林文韜等素被兵丁欺凌希圖抵制該處小刀會卽由此而起是楊祐等實爲此案罪魁自應從重定擬乃黃仕簡等僅照尋常爭毆折傷人肢體者一律科斷殊屬輕縱黃仕簡楊廷樺著交部議處尋議銷去加一級免降調十一月奏訪聞臺灣淡水屬奸民林淡等焚燒斃命隔兩月營員未曾具報見將諱匿玩延之副將左英移督臣題參並囑鎮臣柴大紀到臺督辦上是之十二月入覲賜雙眼花翎黑狐端罩四十九年正月命在御前侍衛上行走上年南巡仍扈駕出京三月回任五十年正月與千叟宴五十一年正月因失跌請解任調理諭曰據雅德奏福建水師提督黃仕簡自上年失跌染患風疾乍瘡乍發心神恍惚氣體虛弱一時恐難全愈已委福

寧鎮總兵何俊前往廈門幫辦水師提督事務並據該提督具奏患病情形請解任調理等語黃仕簡久任水師提督經理妥協而查辦械鬪一案尤著勞績方資倚任今因失跌染患風疾朕篤厯念著賞給人藥二斤高麗清心丸二十九御用大荷包一對小荷包二對用示恩眷並諭令該提督加意調養不必開缺以冀就痊至該提督宣力年久偶患風疾固不忍卽令開缺但海疆重任關係緊要若該提督在任總理營務仍不免勞勦精神朕心更有所不忍見在雅德已委何俊前往代辦水師提督事務廈門距漳州不遠該提督自揣於病勢有益不妨與雅德商酌竟行回籍調理卽令何俊暫署提督事務並著雅德將該提督近來病勢如何曾否全愈迅速覆奏以慰懸注二月奏臺灣淡水同知潘凱赴貓裏社相驗中途被賊戕害並斃跟役十餘人見調官兵船隻軍火器械如係生番逞兇當力疾渡臺督剿諭曰朕聞有黃仕簡五百里奏報恐伊病勢加劇深爲軫惻及披閱奏摺乃係此事轉覺慰幸但官員竟被殺害不法已極不可不嚴加究治如係刁民謀害裝點生番形迹卽嚴拏首從各犯務獲嚴審確情立正刑誅毋使一人漏網若係生番所殺卽帶兵搜捕速拏正犯嚴辦以儆兇頑黃仕簡一聞信息卽力疾

前往甚屬奮勉可嘉續奏接鎮道等咨報同知潘凱係生番殺害卽督官兵渡臺進剿諭曰福建水師提督黃仕簡於查辦生番一案一聞稟報卽力疾前往督辦實屬奮勉出力殊堪嘉獎著加太子太保銜以示優眷旋奏同知潘凱係被直加未南及日懷二社生番殺害臣渡臺後會同鎮道督兵分投剿捕先後殺獲兇番首級三十八中槍落崖身死者百數十業將二社巢穴剿洗諭曰生番膽敢戕害官役實爲兇橫不法黃仕簡等聞信後卽渡臺剿捕殲戮無遺辦理甚爲妥速俱著交部議敍旋議加一級九月奏諸羅縣民楊功懋等兄弟因爭財起釁糾衆立會經臺灣鎮道飭屬查獲匪徒張泮等十四名石溜班汛把總陳和拏獲張烈解縣行至斗六門突被數十人持械奪犯陳和被戕卽督飭文武員弁嚴拏據鎮臣柴大紀等報稱陸續拏獲首從各犯楊功懋等五十三名諭曰楊功懋等釁起家庭膽敢私立會名結黨聚衆經把總陳和拏獲匪犯張烈復敢奪犯戕官實屬不法所有見獲之首從各犯楊懋功等五十三名著常青黃仕簡等審訊明確一面具奏一面將首要各重犯卽在該處正法示衆十二月臺灣逆匪林爽文滋擾黃仕簡奏帶兵由鹿耳門飛渡進剿諭曰黃仕簡甫經病愈一聞匪犯滋事之信卽

帶兵渡臺殊屬奮勉可嘉著賞給荷包等件以示優眷並著於辦理剿捕諸務外
仍加意調攝勿過勞勦至賊匪久磨烏合黃仕簡到彼督率該鎮道盡力堵剿無
難立就撲滅時陸路提督任承恩奏帶兵渡臺會剿諭曰此等奸民不過久磨烏
合上年臺灣卽有漳泉二處匪徒械鬪滋擾等案一經黃仕簡帶兵前往督辦立
卽撲滅今林爽文等結黨橫行情事相等即使該提督病後精神未能周到亦祇
可添派能事總兵一員協剿任承恩本不應前往今已渡臺亦不必拘泥回任務
須會同黃仕簡分路夾攻以期剋日歲功五十二年正月諭曰昨據徐嗣曾奏稱
黃仕簡到臺後礮打死賊匪二千餘人賊俱星散奔逃內山等語內山係生番巢
穴賊匪被官兵追剿窮蹙逃竄或將所掠財物賄結生番容留藏匿或恃其人衆
脅制生番尤不可不預行籌辦見在水陸兩提督帶領多兵自當乘此兵力搜剿
殲除勿令賊匪得以逃匿負嵎又諭曰黃仕簡抵臺迄今一月有餘尙未據奏報
剿賊消息卽待厚集兵力剋期進攻亦應將賊情隨時奏報乃目今總無消息所
辦何事看來黃仕簡於剿捕事宜不能得力著常青卽速渡臺督同黃仕簡等剿
捕旋奏臣於正月初四抵臺先督兵守禦郡城十二日金門南澳銅山等標兵續

到遣海壇鎮郝壯猷率同副將丁朝雄等領兵往南路恢復鳳山又遣臺灣鎮總兵柴大紀率同參將潘韜等帶兵往北恢復諸羅彰化臣同臺灣道永福帶兵在南北處策應諭曰前據常青奏彰化縣城久經陳邦光等收復其鳳山等處亦經柴大紀等分路剿捕郡城已無事矣何以黃仕簡摺內僅稱派委總兵等分赴南北二路進剿恢復縣城竟似該處情形全未知悉者看來黃仕簡竟是安坐郡城並不親赴各該處督率剿捕大屬非是提督爲專閩大員領兵是其專責黃仕簡深受朕恩見帶兵剿賊雖係病後理宜奮勉出力乃於剿捕事宜奏報遲延全不得行軍要領該提督所司何事著傳旨嚴行申飭旋奏臺匪滋事其間迫脅隨行者不少經臣檄示民人凡被脅者速行解散諭曰黃仕簡所奏非是此等辦法或因起事之初兵少賊多爲一時權宜之計則可若軍威壯盛自當趁此兵力蕩洗賊巢勿使轉留餘孽若黨羽旣散將來如何按名究辦况大兵一撤賊夥散而復聚豈不更煩兵力此皆平日伊等將就了事之見此次林爽文等糾衆滋事卽由從前姑息養癰所致今該犯等肆逆至此豈可不殲戮淨盡以絕根株二月奏據北路總兵柴大紀克復諸羅林爽文潛回大里杙見在相機擒拏上以其遷延觀

望再行嚴飭又柴大紀奏仕簡派同剿賊之參將潘韜兵丁三百名留駐郡城自衛命常青查明據實奏參三月奏總兵郝壯猷見已克復鳳山南路岡山崙仔頂各處係賊藪臣飛遣官兵往捕又淡水之新園等處賊勢猖獗飛咨郝壯猷派兵往剿並令游擊鄭嵩赴援查各路賊勢雖疊被官兵剿戮餘匪尙東徙西奔必須分頭剿捕除淨根株不遺餘孽諭曰黃仕簡奏報剿洗南路賊匪克復鳳山縣城一摺其所陳功案俱係罪案摺內既稱南路之岡山崙仔頂等各處俱係賊藪勢甚猖獗自應一舉撲滅何不親率弁兵前往剿捕乃惟添遣官兵飛檄該鎮將等進攻似此東堵西禦疲於來往適足爲賊所輕亥曆草竊自然毫無顧忌日積日多至遊擊鄭嵩等分路進攻鳳山收復城池時伊仍安然坐守又不親往是誠何心又摺內稱官兵疊次剿賊餘匪東徙西奔四處皆有賊蹤等語黃仕簡並不親剿賊巢將首逆擒獲致賊夥蔓延團結乃尙稱除盡根株不留餘孽伊試自思數月之久所辦何事賊勢尙如此鴻張惟與任承恩互相推諉非伊二人貽誤而何尙覲顏爲此語乎黃仕簡任承恩始終貽誤緊要軍機其咎甚重必須拏問常青到臺灣後先將伊二人摘去花翎令其由北路回至內地廈門並著李侍堯於任

承恩到後卽行委員解京黃仕簡留廈門候旨時新授閩浙總督李侍堯渡臺灣奏南北兩路提臣互相推諉復命將任承恩革職拏問仕簡到廈門時一併傳旨革職旋李侍堯又奏仕簡駐守郡城不能督率剿捕以致賊匪嘯聚諭曰本日李侍堯奏到並鈔錄海防同知楊廷理原稟據稱賊匪滋事以來大兵僅屬固守皆以兵單難於遠捕爲辭黃仕簡駐守郡城致賊匪嘯聚等語昨經降旨將任承恩革職拏問尙以黃仕簡年老有病僅令革職撤回內地今伊等如此貽誤則二人厥罪維均黃仕簡亦難稍爲寬宥著李侍堯一俟黃仕簡回廈門著傳旨一併革職拏交刑部治罪四月常青奏臣到臺灣遵將欽奉上諭付仕簡閱看並詢以剿賊機宜仕簡言語不清步履艱難病憊屬實接見在城員弁訪問見在賊勢與該提督等從前咨報迥殊請將仕簡等治罪諭曰昨已降旨將黃仕簡撤回內地俟伊到廈門時著李侍堯卽傳旨將伊一併革職拏交刑部治罪若論黃仕簡任承恩遺誤緊要軍務之罪均應按律卽行正法但念黃仕簡年老又係病後且伊從前辦事尙屬貽勉受恩最久所有公爵係伊祖所立功績自應承襲卽照黃仕簡從前原奏令伊長孫黃嘉謨承襲六月諭曰臺灣逆匪林爽文糾衆滋事黃仕簡

駐守郡城任承恩安坐鹿仔港僅派委將弁等零星打仗彼此觀望遷延以致賊匪日久未能撲滅貽誤軍機較郝壯猷之遇賊退避棄城潛逃者厥罪維均本應一體寘以重典因念黃仕簡年老患病且伊從前辦事尙屬奮勉受恩最久是以貸其一死未卽在臺灣一律正法僅令常青將黃仕簡革職拏解赴行在今據常青等委員將仕簡解到令軍機大臣訊問伊供認各罪情甘重典但供詞尙有支吾狡展避重就輕難以憑信之處已降諭旨令常青藍元枚等查明據實覆奏黃仕簡著交刑部嚴行監禁俟常青查明到日若伊二人旣貽誤於前又復巧飾於後是卽不知朕恩仍應照律治罪十月命大學士九卿等會同嚴審定擬具奏尋奏黃仕簡業將貽誤軍機自行供認不諱請依統兵將帥致誤軍機例擬斬立決奉旨從寬改爲應斬監候秋後處決十二月諭曰本日旬到朝審官犯內黃仕簡究係老年抱病一聞逆匪滋事之信卽力疾渡洋猶知以公事爲重其按兵株守漫無籌畫實由老病昏憒尙非出於有心是以姑從寬典免其旬決但溺職辜恩致逆匪負嵎猖獗該處兵民受狀者不少今剿捕事務尙未完竣皆伊之罪茲雖曲加恩貸已屬格外從寬未便卽行釋放黃仕簡仍著革職監禁五十三年二

月諭曰前年臺灣逆匪滋事黃仕簡因循延玩貽誤事機覈其情罪本應按律正法但念伊祖父世有勞績而黃仕簡向來辦事尙屬奮勉此次帶兵渡洋因循玩誤究因老病昏憒尙非出於有心是以上屆朝審句到時從寬免其句決見在臺灣已屆歲事黃仕簡著加恩釋放飭回原籍閉門靜居思過以示法外施仁至意五十四年卒於家子秉淳乾隆三十二年授藍翎侍衛三十八年授江南督標中營都司四十四年擢湖南沅州協副將四十八年二月諭曰福建提督黃仕簡之子黃秉淳見任湖南沅州協副將平日於營伍諸事是否能留心整飭量其才具將來堪勝總兵與否之處著傳諭舒常秉公據實覆奏諭曰據舒常奏黃仕簡子秉淳氣體薄弱步箭騎射未能出色是以從優保列三等又稱總兵大員有整飭將弁之責不僅以本身技藝爲長若以黃秉淳辦事才具將來尙堪勝總兵之任等語所奏兩歧不無觀望之意殊屬非是仍著傳諭舒常究竟黃秉淳平日辦事若何是否能勝總兵之任並見任沅州協副將是否不形竭蹶令其另行詳悉覆奏七月諭曰前據舒常覆奏沅州協副將黃秉淳於訓練操防各事宜俱能實心辦理營務亦頗整飭其才具尙可勝總兵之任等語仕簡之子黃秉淳才具既可

勝總兵之任自應給咨送部引見見在黃仕簡奏請陞見已令其於臘底到京黃秉淳亦應於彼時來京可以順便見伊父仕簡隨傳諭舒常屆期給與黃秉淳咨文令其於十二月到京引見將此諭令知之四十九年擢河南南陽鎮總兵五十一年調江蘇狼山鎮總兵五十一年卒諭曰據李世傑奏狼山鎮總兵黃秉淳病故黃秉淳係黃仕簡長子今患病身故黃仕簡聞之自必傷感但修短有數亦屬無可如何且黃仕簡病愈未久亦不可過於悲悼勉自節攝以慰廬注著賞給黃辦大荷包一對以示體卹至黃仕簡辦理海疆甚屬出力所有公爵應令何人承襲之處著黃仕簡自行酌量或於伊諸子中選擇一人或令其長孫承襲均聽黃仕簡之便酌定具奏朕當俞允也奏准以長孫嘉謨承襲五十五年兵部帶領引見奉旨黃嘉謨著在頭等侍衛上行走嘉慶四年五月命爲散秩大臣十月授浙江溫州鎮總兵

藍元枚

藍元枚福建漳浦人祖廷珍由行伍官至福建水師提督以平朱一貴功授三等輕車都尉世職贈太子少保謚襄毅自有傳父日寵官福建銅山營水師參將元

清史列傳

枚由世職隨標學習三十一年四月部議迴避本省奉旨發往廣東以外海水師參將補用三十三年七月補海門營參將三十五年七月擢龍門協副將三十八年正月因拏獲潛匿安南販賣夷鹽之逃軍趙元榮等調澄海協副將十月擢福建臺灣鎮總兵十二月調金門鎮上以元枚籍隸閩省命撫臣鍾音留心察看有無贍徇情事三十九年八月鍾音覆奏元枚熟習海洋情形考拔弁兵糧缺尙屬秉公無徇私贍顧事四十年六月丁母憂四十三年七月補江南蘇松鎮總兵四十七年五月署江南提督四十九年四月實授五十二年正月臺灣逆匪林爽文滋事上以元枚籍隸福建漳州兵衆所悉於該處情形自能熟諳諭令元枚卽馳驛前往泉州署理福建陸路提督卽駐劄蚶江一帶接應一切事宜二月奏馳抵福州隨訪探臺匪情形自官兵渡臺後紛紛潰散但恐四方竄逸逃入內山與生番勾結搜捕更稽時日臣抵泉後當與督臣常青等實力查拏諭曰內山雖係生番巢穴但賊匪窮蹙無歸或以賄結或以勢脅生番容留藏匿將來大兵撤後潛出滋擾尤屬不成事體該督等務須乘此兵力上緊搜捕俾盡根株以靖海疆初八日奏馳抵泉州查鹿仔港及北路之祚艋等處皆有官兵率同義民各相保護